

# पावलसे एफिससला विश्वासीगदेदा भ्रिबा चिठी

## चु चिठीला बारेरी पाड्तोःमा

**भ्रिबा म्हिः** येशूला मुल चेला पावलसे भ्रिबा मुबा (एफिसी १:१)।

**भ्रिबा ग्लाः** रोम शहरला भयाल्खानग्याम भ्रिबा मुबा।

**भ्रिबा सालः** ओस्पन ईश्वी संवत् ६१-६३ (विक्रम संवत् ११८-१२०)  
सालला गुडरी भ्रिबा मुबा।

**खाल्दा भ्रिबाः** एफिसस शहररी मुबा मण्डलीदेन थेला डाम डामला  
ग्लारी मुबा मण्डलीगदेदा भ्रिबा मुबा।

चु चिठीरी जम्मान भन्दा डाच्छा परमेश्वरसे म्हन्बा अन्छारला ख्रीष्टदा जम्मान स्हेला मुल स्होसी जम्मान स्हे ख्रीष्टला तहरी थान्जी भिसी भ्रिबा मुला (एफिसी १:६-१०)। चु चिठी चा परमेश्वरला म्हिगदे ख्रीष्टदेन छ्याम गिक तसी परमेश्वरसे म्हन्बा अन्छार सोगै भिसी भ्रिबा हिन्ना।

चु चिठीला डाच्छाला अध्यायरी खाहड् लसी य्हाड ख्रीष्टदेन छ्याम गिक तजी भिबा तामला बारेरी पाड्बा मुला। परमेश्वर आबासे हाडला म्हिगदेदा धम्सी हाडला भा येशू ख्रीष्टग्याम थेनीगदेला पापला दोष मेटब लसी पापग्याम फेजी, ओच्छे परमेश्वरसे हाडसे लबा घेन कबुल हाडला आत्मा बैना पिन्सी पक्का लजी। लिच्छापट्टिला अध्यायरी चा पावलसे चु चिठी पढब लबागदेदा ख्रीष्टदेन छ्याम गिक तबा अन्छारला बानीबेहोर उन्नो भिसी बिन्ती लबा मुला।

परमेश्वरला म्हिगदे ख्रीष्टदेन छ्याम गिक तबा तामगदे उन्बाला लागिरी पावलसे चुहड्बा तामगदे पाड्बा मुला। मण्डली चा ख्रीष्टला ल्हुइ हड्बान

हिन्ना, मण्डलीला थोबो चा ख्रीष्ट हिन्ना। ओच्छे मण्डली दिम हड्बान हिन्ना, थे दिमला सुर युडबा चा ख्रीष्ट हिन्ना। थेहड् लसी मण्डली चाडछार हड्बान हिन्ना, ओच्छे म्हाछार चा ख्रीष्ट हिन्ना। चु चिठीरी पावलसे बलि, माफ, दयामायादेन चोखो ओच्छे ख्रीष्टला मायाला बारेरी घेन घेन ताम भ्रिबा मुला।

### मुल तामगदे

- फ्याफुल्बा १:१-२
- ख्रीष्टदेन ख्रीष्टदा विश्वास लबागदे १:३-३:२१
- ख्रीष्टदेन छ्याम मुबा छार जुनी ४:१-६:२०
- चिठीला थुमरी भ्रिबा तामगदे ६:२१-२४

# पावलसे एफिससला विश्वासीगदेदा भिबा चिठी

१ लास्सो, एफिससरी मुबा जम्मान परमेश्वरला म्हिगदेदा डा पावलग्याम फ्याफुल्ला! डा परमेश्वरसे ख्रीष्ट येशूला गे लबाला लागिरी धम्बा मुल चेला हिन्ना। एनीगदे, ख्रीष्ट येशूदा सदन विश्वास लसी चिबागदेदा,\* २यहाडला परमेश्वर आबादेन प्रभु येशू ख्रीष्टग्याम दयामायादेन शान्ति तगै।

## ख्रीष्टग्याम याड्बा मोलम

३यहाडला प्रभु येशू ख्रीष्टला आबा परमेश्वरला जयजयकार तगै। तिगदा भिसम ख्रीष्टदेन छ्याम गिक तबासे लमा परमेश्वरसे यहाडदा स्वर्गला जम्मान मोलम पिन्बा मुला। थे मोलमगदे चा चुनोन हिन्ना। ४चोखोदेन तिगै दोष आरेबा म्हि स्होबाला लागिरी परमेश्वरसे ख्रीष्टदेन छ्याम गिक स्होसी चु जम्बुलिड स्होबा भन्दा डाच्छान धम्बा हिन्ना।

५परमेश्वरसे यहाडदा माया लसी येशू ख्रीष्टग्याम थेसे हाडला सेमसे म्हन्बा हड्बान कोलागदे स्होबारी यहाडदा डाच्छाहेन्सेन धम्बा मुबा। ६परमेश्वरसे हाडला सेमहेन्से माया लबा भाग्याम यहाडदा ल्हानान दया लसी मोलम पिन्बा मुला। थेतबासेलमा यहाडसे परमेश्वरला जयजयकार लतो:ला। ७-८परमेश्वरसे यहाडदा ल्हानान दयामाया लबासे लमा यहाडसे ख्रीष्टग्याम थार्बा याड्बा मुला। थेनोन ख्रीष्टला कासे यहाडला पापला सय फासी यहाडदा पापग्याम फेबा मुला।\* ९-१०चुहड् लसीन परमेश्वरसे हाडला पूरा ज्ञान बुद्धिग्याम थेला सेमला ताम यहाडदा घोना लबा मुला। थेला सेमला ताम चा धुइ तमाहेन्से हाडसे म्हन्बा अन्छारला स्वर्गदेन जम्बुलिडरी मुबा जम्मान स्हेगदे ख्रीष्टसे गला गिकरी पोप लसी शासन लबा हिन्ना। चु चा थेसे म्हन्बा अन्छार डाच्छाहेन्से

ख्रीष्ट येशूग्याम स्होसी थान्बा ताम हिन्ना।

११ थेतबासेलमा परमेश्वरसे हाडसे म्हन्बा अन्छार जम्मान ताम पूरा लबा मुला। थेहड् लसीन यहाडदाएनोन ख्रीष्टदेन छ्याम गिक स्होसी थेला म्हि स्होबा मुला। १२ ख्रीष्ट येशूथोरी डाच्छाहेन्सेन आश लबा डनी यहूदीगदेदा परमेश्वरसे थेला यहालदेन शक्तिला जयजयकार लगै भिसी धम्बा मुला।

१३ थेहड् लसीन एनीगदेसेनोन थार्बा पिन्बा समाचार सत्य बचन थे:सी ख्रीष्ट येशूदा विश्वास लजी। थेतबासेलमा एनीगदेदा डालान हिन्ना भिसी परमेश्वरसे हाडला आत्मासे छाप लबा मुला। चुनोन आत्मा परमेश्वरसे हाडला म्हिदा पिन्ना भिसी लबा कबुल हिन्ना। १४ यहाड परमेश्वरला म्हिसे याड्तो:बा हकदेन पापग्याम पूरान फेला भिबा ताम उन्बाला लागिरी परमेश्वरसे थेला आत्मा बैना पिन्बा मुला। थेतबासेलमा यहाडसे परमेश्वरला यहालदेन शक्तिला जयजयकार लतो:ला।

**पावलसे एफिससरी मुबा  
विश्वासीगदेला लागिरी लबा  
प्रार्थना**

१५-१६ थेतबासेलमा एनीगदेसे प्रभु येशूदा विश्वास लबा मुला भिबादेन

परमेश्वरला म्हिगदेदा माया लबा मुला भिबा ताम थे:सी डाइ एनीगदेला लागिरी सदन परमेश्वरदा धन्यवाद पिन्बान चुहड् लसी प्रार्थना लबा मुला। १७ प्रभु येशू ख्रीष्टला परमेश्वर यहाडसे मान लतो:बा परमेश्वर आबासे एनीगदेदा हाडला आत्मा पिन्ना। थेनोन आत्माग्याम परमेश्वरदा डोसेबा ज्ञान याड्सी थेला बारेरी अभ घोखम्मौ। १८ थेहड् लसीन परमेश्वरला यहाल याड्बाला लागिरी एनीगदेला सेम छोर्सी एनीगदेदा तिग आश उन्सी ड्योडबा मुबा थे घोखम्मौ। ओच्छे थेसे हाडला म्हिगदेदेन कबुल लमा पिन्ना भिबा मोलम गाते घेन गाते ल्हाना मुला थे था याड्गै। १९ ओच्छे यहाड विश्वास लबागदेला लागिरी गे लबा परमेश्वरला शक्ति गाते घेन मुला थे एनीगदेसे घोखम्मौ भिसीएनोन डाइ प्रार्थना लबा मुला। २० थेनोन शक्तिग्याम परमेश्वरसे ख्रीष्ट येशूदा सिबाग्याम सोना लसी स्वर्गी हाडला दाहिने छ्यापट्टि मुल ठिरी चिपुड्जी।\* २१ ओच्छे परमेश्वरसे ख्रीष्ट येशूदा जम्बुलिडदेन मुरी मुबा जम्मान शासन लबागदे, अधिकार मुबागदे, शक्ति मुबागदे, ग्लेगदेदेन जम्मान मिनथोरी शासन लबा अधिकार पिन्जी। दान्देला धुडरी जे आहिन, तर लिच्छा खबा धुडरीनोन चु जम्मानथोरी थेदा शासन लबा अधिकार पिन्बा मुला।

२२थेहड्ड लसीन परमेश्वरसे जम्मान स्हेगदे ख्रीष्टला स्थहाप धिरी थान्सी मण्डलीला लागिरी ख्रीष्ट येशूदा जम्मान स्हेला थोबो स्होजी।\*  
 २३मण्डली चा ख्रीष्टला लहुइ हिन्ना। थेग्यामसे मण्डली पूरा तमुला। ओच्छे जम्मान स्हेगदे पूरा तना लबाएनोन थेनोन हिन्ना।\*

### यहाडदा परमेश्वरसे दया लसी सोना लजी

२ एनीगदे हाडलान पापग्याम सिबा धुइरी परमेश्वरसे एनीगदेदा सोना लजी।\* २थे धुइरी एनीगदे जम्बुलिडला आज्यबा ठिमला लिच्छा भ्रमुबा ओच्छे म्हाडगदेला यहुल्सारी शासन लबा शैतानसे कुल्बा ताम इयान्सी भ्रमुबा। दान्देनोन परमेश्वरसे कुल्बा ताम आड्यान्बागदेदा थेसे हाडला तहरी थान्बा मुला। ३डाच्छा मी यहाड जम्मान थेनीगदे हड्डबान सेमरी लहुइला लागिरी जे लइ म्हन्बा थेनोन लसी भ्रबा म्हि हिन्ना। यहाडला थेहड्डबा बानीबेहोर अन्छार मी स्थहान्दोगदेसे हड्डनोन यहाडसेनोन परमेश्वरग्याम सजाय याड्तो:बा मुबा। ४तर यहाडला परमेश्वर ल्हानान दया लबा परमेश्वर हिन्ना। ओच्छे यहाडदा ल्हानान माया लबा मुला। ५थेतबासेलमान यहाड पापरी सिसैनोन परमेश्वरसे

ख्रीष्ट येशूदेन छ्यामनोन सोना लजी। एनीगदेसे याड्डबा थार्बाएनोन थेनोन परमेश्वरला दयामायासे हिन्ना। ६ख्रीष्ट येशूदेन छ्याम गिक स्होबासे लमा परमेश्वरसे यहाडदा येशू ख्रीष्टदेन छ्याम सोना लसी स्वर्गरी थेदेन छ्यामनोन चिपुड्जी। ७परमेश्वरसे चुहड्डबा गे लसी लिच्छाला धुइला लागिरी थेला घेन दयामाया उन्बा मुला। येशू ख्रीष्टसे यहाडला लागिरी जम्मान गे लबासे लमा यहाडसे चु दयामाया याड्डबा मुला। ८तिग्दा भिसम परमेश्वरला दयामायाग्याम यहाडला विश्वाससे लमान यहाडसे थार्बा याड्डबा हिन्ना। चु चा एनीगदेसे लबा गेग्याम आहिन, तर परमेश्वरसे पिन्बा मोलमग्याम हिन्ना। ९म्हिसे लबा गेग्याम थार्बा याड्डबा हिन्सम म्हि घमण्डी दोसेला मुबा। १०तिग्दा भिसम यहाडसे ज्यबा गे लगै भिसी परमेश्वरसे यहाडदा येशू ख्रीष्टग्याम छार म्हि स्होबा हिन्ना। थेसे म्हन्बा अन्छार भ्रगै भिसीन परमेश्वरसे यहाडदा डाच्छाहेन्सेन स्होबा मुबा।

### येशू ख्रीष्टरी जम्मान गिक हिन्ना

११थेतबासेलमा एनीगदेसे चु ताम थाम्ले:गो, डाच्छा लहुइरी खतना लबा यहूदीगदेसे घमण्ड लसी एनीगदेदा खतना आलबा अर्गु यहुलला म्हि भिसी भिबा मुबा। १२थे धुइरी एनीगदे

ख्रीष्टग्याम थारेड मुबा। ओच्छे  
इस्नाएलीगदेसे याड्बा हकग्यामएनोन  
थारेड मुबा। थेहड् लसीन परमेश्वरसे  
हाडला म्हिगदेदा पिन्ना भिसी लबा  
कबुलगदेरीनोन एनीगदेला तिगै  
हक आरेबा मुबा। थेतबासेलमा  
एनीगदे जम्बुलिडरी आश आरेबादेन  
परमेश्वरदा डोआसेबा म्हि मुबा।  
१३तर दान्दे एनीगदे ख्रीष्ट येशूदेन  
छ्याम गिक तबा मुला। डाच्छा एनीगदे  
परमेश्वरग्याम थारेड मुबा दान्दे ख्रीष्ट  
येशूसे बगब लबा काग्याम एनीगदेदा  
परमेश्वरला डामरी भबा मुला।

१४यहाडदा शान्ति पिन्बा येशू  
ख्रीष्टनोन हिन्ना। तिगदा भिसम डाच्छा  
यहाडला गुडरी यहूदीदेन अर्गु यहुलला  
म्हि भिसी फेबारी पर्खाल हड्बा शत्रु  
मुबा। थेसे थे पर्खाल हड्बा शत्रुदा  
नाश लसी यहाडदा गिकनोन स्होजी।  
१५ओच्छे येशू ख्रीष्टसे यहूदीगदेदेन  
अर्गु यहुलला म्हिगदेदा ढिकना लबादेन  
हाडग्याम छार म्हि स्होबारी हाडलान  
ल्हुड पिन्सी यहूदीगदेला ठिमदेन  
ठिमसे कुल्बा तामगदे नाश लजी।\*  
१६थेहड् लसीन येशू ख्रीष्ट हाडनोन  
कुसरी सिसी यहाड न्हडरी गिकसे  
स्थान्दोदा शत्रु भिसी म्हन्बा तामदा  
नाश लजी। ओच्छे यहाडदा गिकनोन  
स्होसी परमेश्वरदेन छ्याम ढिकना  
लजी। १७येशू ख्रीष्ट हाडनोन फेप्खसी  
परमेश्वरग्याम थारेड मुबा एनीगदे

अर्गु यहुलला म्हिगदेदेन परमेश्वरला  
डामरी मुबा डनी यहूदीगदे जम्मादान  
शान्ति पिन्बा ज्यबा समाचार थे:ना  
लजी। १८दान्दे डनी यहूदीदेन एनी  
अर्गु यहुलला म्हि, यहाड न्हीसेन  
ख्रीष्ट येशूग्याम परमेश्वरला आत्मा  
गिकनोन याड्सी परमेश्वर आबा मुबा  
ग्लारी निम्याड्बा मुला।

१९दाहेन्से एनीगदे विदेशी परदेसी  
आहिन। तर परमेश्वरला सन्तान  
हिन्ना। थेतबासेलमा परमेश्वरला  
म्हिगदेसे याड्बा हक एनीगदेसेनोन  
याड्बा मुला। २०एनीगदे चा मुल  
चेलादेन अगमवक्तागदेला जगथोरी  
स्होबा दिम हिन्ना। थे दिमला सुर  
युडबा चा ख्रीष्ट येशून हिन्ना।  
२१थेतबासेलमा थे दिम पूरा  
प्रभुग्यामसेन जोडब तसी भड्बान  
परमेश्वरला लागिरी फेसी थान्बा  
चोखो मन्दिर दोबान निला।  
२२थेहड् लसीन ख्रीष्टदेन गिक तसी  
एनीगदेएनोन डनी यहूदीगदेदेन छ्याम  
परमेश्वरला मन्दिर दोबान निबा  
मुला। थे मन्दिररी परमेश्वर हाडला  
आत्माग्याम धन्छ्याला।

अर्गु यहुलला म्हिगदेदा पावलसे  
येशू ख्रीष्टला समाचार थे:ना लबा

३ थेतबासेलमा डा पावल एनीगदे  
अर्गु यहुलला म्हिदा ख्रीष्ट येशू-  
ला समाचार थे:ना लमा भयाल्खानरी

परब तबा हिन्ना। २एनीगदे अर्गु  
 यहुलला म्हिगदेला लागिरी परमेश्वरसे  
 थेला दयामायग्याम चु गे डादा जिम्मा  
 पिन्बा मुला भिबा ताम एनीगदेसेनोन  
 था याड्सी जिन्बा मुला। ३परमेश्वरसे  
 डादा थेला सेमला ताम घोना लबा  
 मुला। चु तामला बारेरी एनीगदेला  
 लागिरी डाइ डाच्छान जजाकी भिबा  
 मुला। ४चु ताम पढब लमाहेन्से ख्रीष्ट-  
 ला बारेरी परमेश्वरला सेमरी मुबा  
 ताम डाइ गाते घोजीम भिसी एनीगदेसे  
 घोख्म्ला। ५डाच्छा मी परमेश्वरसे  
 हाडला सेमला ताम म्हिगदेदा घोना  
 लबा आरेमुबा। तर दान्दे परमेश्वरसे  
 हाडला आत्माग्याम धम्बा हाडला  
 मुल चेलादेन अगमवक्तागदेदा घोना  
 लबा मुला। ६चु ताम चा अर्गु यहुलला  
 म्हिगदेसे परमेश्वरला थाबा पिन्बा  
 समाचार थे:सी विश्वास लमाहेन्से  
 यहूदीगदेसे हड्दोनोन परमेश्वरला  
 मोलम याड्बा हिन्ना। थेतबासेलमा  
 दाहेन्से थेन्नी गिकनोन तबा मुला।  
 ओच्छे परमेश्वरसे येशू ख्रीष्टग्याम  
 हाडला म्हिगदेदा पिन्ना भिसी लबा  
 कबुल एनीगदे अर्गु यहुलला म्हिसेनोन  
 याड्बा मुला।\*

७ओच्छे परमेश्वरसेन दयामायादेन  
 शक्तिग्याम थेला मोलम अन्छार डादा  
 चु थाबा पिन्बा समाचार थे:ना लबा  
 म्हि स्होजी। ८परमेश्वरला म्हिगदे  
 न्हडरी डा जम्मान भन्दा गे आखेलबा

म्हि तसैनोन परमेश्वरसे डादा  
 दयामाया लसी ख्रीष्टग्याम यहाडसे  
 याड्बा म्हन्बारीन आखम्बा मोलमला  
 समाचार अर्गु यहुलला म्हिगदेदा थे:ना  
 लबारी डादा धम्बा मुला। ९जम्मान स्हे  
 स्होबा परमेश्वरसे हाडला सेमला ताम  
 दडबोहेन्सेन खालैदा उन्बा आरेबा।  
 तर दान्दे परमेश्वरसे थे ताम खाहड्  
 लसी उन्सी पूरा लजी भिसी जम्मान  
 म्हिदा घोना लबा गेएनोन डादा पिन्बा  
 मुला। १०परमेश्वरला सेमला ताम  
 चा मण्डलीग्याम हाडला ज्ञान बुद्धि  
 मुरी मुबा शक्तिदेन शासन लबागदेदा  
 उन्बा हिन्ना। ११चु चा जुकजुकहेन्सेन  
 परमेश्वरसे म्हन्बा अन्छार यहाडला  
 प्रभु येशू ख्रीष्टग्याम पूरा लबा हिन्ना।  
 १२ओच्छे यहाडसे येशू ख्रीष्टदा  
 विश्वास लसी थेदेन छ्याम गिक  
 तबासे लमा परमेश्वर मुबा ग्लारी निबा  
 भड याड्बा मुला। १३थेतबासेलमा  
 एनीगदेला लागिरी डाइ नाबा दुख  
 प्राड्सी एनीगदे आत्तेब थातउ। तिग्दा  
 भिसम चु मी एनीगदेला लागिरी मान  
 याड्बादेन ताड्तो:बा ताम हिन्ना।

**पावलसे दो:सीएनोन एफिससला  
 मण्डलीला लागिरी लबा प्रार्थना**

१४-१५ थेतबासेलमान स्वर्गदेन  
 जम्बुलिडरी मुबा जम्मान यहुलला म्हि  
 स्होबा परमेश्वर आबादा डाइ पुइ  
 जूसी प्रार्थना लबा मुला। १६परमेश्वरसे

ह्लाडला आत्माला शक्तिग्याम ल्हानान मोलम पिन्सी एनीगदेला सेम खाइमै याडयोड आतबा भड याङ्गै।<sup>१७</sup>ओच्छे एनीगदेसे ख्रीष्टदा विश्वास लबासे लमा ख्रीष्ट सदन एनीगदेला सेमरी धन्छ्यागै। ओच्छे एनीगदे परमेश्वरला मायारी खाइमै याडयोड आतना भड्बा तसी चिख्मौ।<sup>१८</sup>थेहड् लसीन परमेश्वरला म्हिगदे जम्मानदेन छ्याम ख्रीष्टला माया गाते ल्हानान मुला भिसी एनीगदेसे घोख्मौ।<sup>१९</sup>ओच्छे म्हिला ज्ञान बुद्धिसे घोबारी म्हाइसै घोआख्म्बा ख्रीष्टला माया घोख्मौ। थेहड् लसीन परमेश्वर खाहड्बा मुला, एनीगदेएनोन थेहड्बान दोख्मौ। चुहड् लसी डाइ एनीगदेला लागिरी प्रार्थना लबा मुला।<sup>२०</sup>परमेश्वरसे यहाडला गुडरी ह्लाडला शक्तिग्याम गे लमुला। ओच्छे यहाडसे ह्रीबादेन म्हन्बा भन्दा ल्हानान पिन्मुला।<sup>२१</sup>यहाड ख्रीष्ट येशूदेन छ्याम गिक तबा म्हिगदेदेन मण्डलीसे ह्लाड जम्मान भन्दा घेन परमेश्वर हिन्ना भिसी सदन मानदेन जयजयकार लतोःला। आमेन।

### ख्रीष्टदा विश्वास लबागदे जम्मान गिकनोन हिन्ना

४ थेतबासेलमा प्रभुला गे लमा भ्याल्खानरी परब तबा म्हि, डाइ एनीगदेदा परमेश्वरसे धम्बासे

लमा थेसे कुल्बा अन्छार गे लउ भिसी बिन्ती लबा मुला।<sup>२</sup>एनीगदे खाइमै घेन आदोना सोजो म्हि दोसी भ्रउ। ओच्छे गिकसे गिकला ताम नासी ह्लाड ह्लाड न्हडरी माया लसी ठिक्सी चिउ।\*<sup>३</sup>एनीगदेदा परमेश्वरला आत्मासे गिक स्होजी भिबा ताम अन्छार भ्रबारी सदन भड लउ।<sup>४</sup>परमेश्वरसे ड्योडबा धुडरी यहाडसे तिग याङ्गला भिसी आश लमुबा, थे आश गिकनोन हिन्ना। थेहड् लसीन दाहेन्से यहाड लहुड गिकलान हिन्ना। ओच्छे यहाडसे याङ्गबा परमेश्वरला आत्माएनोन गिकनोन हिन्ना।<sup>५</sup>ओच्छे यहाडला प्रभुएनोन गिकनोन, यहाडला विश्वासएनोन गिकनोन ओच्छे यहाडसे किन्बा बप्तिस्माएनोन गिकनोन हिन्ना।<sup>६</sup>थेतबासेलमा दाहेन्से यहाड जम्मालान परमेश्वर आबा गिकनोन हिन्ना। थेनोन जम्मानदेन छ्याम तसी यहाड जम्मानग्याम गे लबा मुला। ओच्छे थेसेन जम्मानथोरी शासन लबा मुला।

<sup>७</sup>तर ख्रीष्टसे ह्लाडला सेमसे म्हन्बा अन्छार यहाड जम्मादान थरी थरीला गे लबा मोलम पिन्बा मुला।<sup>८</sup>थेतबासेलमा परमेश्वरला बचनरी ख्रीष्टला बारेरी चुहड् भिसी भ्रिबा मुला,

“थे तोर फेप्वा धुडरी थेसे ह्लाडला शत्रुदाएनोन खीसी भोर्जी।



ओच्छे म्हिगदेदा मोलम पिन्जी।”<sup>\*</sup>  
<sup>९</sup>थेहड् लसीन बचनरी तोर फेप्जी  
 भिसी भिबाला अर्थ तिग? चु भिबा  
 चा ख्रीष्ट चु जम्बुलिडला धिधोना  
 फेप्जी भिबा आहिन? हिन्ना।  
<sup>१०</sup>थेनोन जम्बुलिडला धिधोना फेप्सी  
 जम्मानथोरी शासन लबारी स्वर्गरी  
 जम्मान भन्दा तोर फेप्जी।

<sup>११</sup>ओच्छे ख्रीष्टसे हाडला गे लगै  
 भिसी कोइ म्हिदा ख्रीष्टला मुल  
 चेला दोबारी, कोइ म्हिदा अगमवक्ता  
 दोबारी, कोइ म्हिदा थार्बा पिन्बा  
 समाचार थे:ना लबारी, कोइ म्हिदा  
 मण्डलीला पास्टरदेन म्हिगदेदा  
 लोप्बा म्हि स्होबारी धम्जी। <sup>१२</sup>तिगदा  
 भिसम परमेश्वरला जम्मान म्हिगदेसे  
 परमेश्वरला गे ज्यना लसी ख्रीष्टला  
 ल्हुइ मण्डलीदा भड्ना लखमै भिसी  
 थेसेन चुहड् लसी धम्बा हिन्ना।  
<sup>१३</sup>थेतबासेलमा यहाडसे परमेश्वरदा  
 लबा विश्वासरी गिक आतनी भिसम  
 ओच्छे थेला भा ख्रीष्टदा ज्यना लसी  
 डोआसेनी भिसम यहाड खाइमै पाको  
 म्हि दोबारी आखम। ओच्छे ख्रीष्ट  
 खाहड्बा मुला थेहड्बाएनोन दोबारी  
 आखम। <sup>१४</sup>दाहेन्से यहाड जुन ताम  
 थे:जी थेनोन तामरी विश्वास लबा  
 कोलागदे हड् लसी आभ्र। तिगदा  
 भिसम कोइ कोइ म्हिगदेसे यहाडदा  
 फसब लबारी ल्हानान थरीला लुसीला  
 तामदाएनोन सत्य ताम हड् लसी

पाड्सी भ्रमुला। <sup>१५</sup>बरु यहाड माया  
 लसी सत्य ताम पाड्सी ख्रीष्ट हड्बान  
 दोगे। तिगदा भिसम ख्रीष्ट चा यहाडला  
 थोबो हिन्ना। <sup>१६</sup>यहाडला ल्हुइरी या  
 काड जोडब लसी ल्हुइ गिकनोन तबा  
 हड् ख्रीष्टसेनोन जम्मादान गिकनोन  
 स्होबा मुला। थेतबासेलमा या काड  
 ढिकसी हाड हाडला गे लबा हड्  
 लसी यहाडएनोन हाड हाड न्हडरी  
 ढिकसी गे लजी भिसम अभ्र यहाड  
 न्हडरी माया लहेबान निला।<sup>\*</sup>

### ख्रीष्टग्याम याड्बा छार जुनी

<sup>१७</sup>ख्रीष्ट येशूला अधिकारग्याम डाइ  
 पाड्बा चु ताम ज्यना लसी ड्यान्गो।  
 दाहेन्से एनीगदे परमेश्वरदा डोआसेबा  
 अर्गु यहुलला म्हिगदे हड् तसी थाभ्रउ।  
 तिगदा भिसम थेनीगदेसे लबा गेदेन  
 म्हन्बा ताम गे आखेल्बा मुला।  
<sup>१८</sup>थेनीगदेसे सत्य ताम आघोमुला  
 ओच्छे थेनीगदेला सेम कोड्बासे  
 लमा थेनीगदेदेन परमेश्वरला बारेरी  
 घोबा ज्ञाननोन आरे। थेतबासेलमा  
 परमेश्वरग्याम याड्तो:बा जुनी  
 थेनीगदेसे याड्बा आरे। <sup>१९</sup>थेनीगदेदा  
 ज्यबा तामदेन आज्यबा ताम तिगै था  
 आरे। थेतबासेलमा थेनीगदेसे सेमरी  
 तिग लइ म्हन्बा थेनोन लसी पे:बा  
 खबा गे जे लसी भ्रमुला।

<sup>२०</sup>तर एनीगदेसे मी ख्रीष्टला बारेरी  
 लोप्बा धुइरी थेहड्बा ताम लोप्बा

आरेबा। <sup>२१</sup>एनीगदेसे ख्रीष्ट येशूला सत्य ताम थे:सी घोबा मुला भिसी डादा था मुला। <sup>२२</sup>थेतबासेलमा एनीगदेदा न्होङ्ना लबा पापी सेमदेन डाच्छाला आज्यबा बानीबेहोर ख्लागो।\* <sup>२३</sup>ओच्छे परमेश्वरला आत्मासे एनीगदेला सेम छार स्होगै। <sup>२४</sup>परमेश्वरसे एनीगदेदा हाड हड्बान म्हि स्होसी छार बानीबेहोर पिन्बा मुला। थेतबासेलमा दाहेन्से एनीगदेसे थे पक्का छार बानीबेहोर अन्छार परमेश्वरदा सेम निबादेन तिगै दोष आरेबा म्हि दोगो।\*

<sup>२५</sup>थेतबासेलमा जम्मासेन लुसीला ताम पाङ्बा ख्लासी विश्वासीगदे न्हडरी सत्य ताम जे पाङ्गो। तिग्दा भिसम यहाड लहुइ गिकलान हिन्ना।\* <sup>२६-२७</sup>ओच्छे बोमो खसैनोन पाप थालउ। तिग्दा भिसम शैतानसे एनीगदेदा पाप लपुङ्गला। थेतबासेलमा धिनी घल्बा भन्दा डाच्छान एनीगदेला बोमो म्हागै।\*

<sup>२८</sup>खालैसे य्हो लबा मुसम दाहेन्से ख्लासी हाडसेन दुख लसी गे लगै, ओच्छे आरेबागदेदा पिन्खम्बा म्हि दोगै।

<sup>२९</sup>एनीगदे हाड हाड न्हडरी आज्यबा ताम थालउ। बरु ज्यबा तामदेन स्थान्दो म्हिला विश्वास बढब तबान निबा खाल्ला ताम जे

लउ। तिग्दा भिसम एनीगदेसे लबा तामग्याम म्हिगदेदा ज्यबा तगै।

<sup>३०</sup>ओच्छे परमेश्वरला आत्मादा दुख थापिन्गो। तिग्दा भिसम एनीगदे पापग्याम फेबा धिन आखतेधोना एनीगदे परमेश्वरलान हिन्ना भिसी परमेश्वरला आत्मासेन छाप लबा मुला।

<sup>३१</sup>थेतबासेलमा दाहेन्से ईख थान्बा, बोमो लबा, म्हिदा बड्बा हड्बा जम्मान आज्यबा ताम एनीगदेसे ख्लागो। <sup>३२</sup>बरु गिकसेम गिकदा सेमहेन्सेन दया लउ। ओच्छे परमेश्वरसे एनीगदेदा ख्रीष्ट येशूग्याम माफ लबा हड् लसी एनीगदेसेनोन गिकसेम गिकदा माफ लउ।\*

### परमेश्वरदा सेम निबा गे जे लउ

**५** एनीगदे परमेश्वरसे माया लबा कोलागदे तबासे लमा परमेश्वर हड्बान दोबारी म्हाइगो। <sup>२</sup>ओच्छे ख्रीष्टसे यहाडदा माया लबा हड् लसी यहाडएनोन हाड हाड न्हडरी माया लसी ढिकसी चितो:ला। तिग्दा भिसम ख्रीष्टसे यहाडदा माया लसी हाडला लहुइनोन पिन्जी। ओच्छे थेला लहुइ बलिदान पिन्सी परमेश्वरला लागिरी ज्यबादेन बास्ना खबा धूप दोजी।\*

<sup>३</sup>एनीगदे परमेश्वरला म्हिगदे तबासे लमा स्थान्दोदेन छ्याम ब्रेल्सी भ्रबा,

नइबा खबा ताम ओच्छे लोभ लबा, चु जम्मान ताम म्हन्बारीनोन आत।  
 ४ओच्छे पेःबा खबा ताम, मूर्ख तामदेन म्हिदा सेम आनिबा ताम थालउ।  
 चुहड्बा ताम लबा चा ज्यबा आहिन। बरु परमेश्वरदा धन्यवाद पिन्गो।  
 ५च्यागो, चु ताम चा एनीगदेदा था तनोन तोःबा ताम हिन्ना। स्थहान्दोदेन छ्याम ब्रेल्सी भ्रबा, नइबा खबा ताम लबा, लोभ लबा म्हिसे परमेश्वरदेन ख्रीष्टला यहुल्सारी तिगै हक आयाड्।  
 लोभ लबा म्हि चा मूर्तिदा परमेश्वर भिसी पूजा लबा म्हि हड्बान हिन्ना।

६एनीगदेदा खालैसेन लुसीला ताम लोप्सी फसब थालगै। थेहड्बा गे लसी परमेश्वरसे कुल्बा ताम आड्यान्बा म्हिगदेदा परमेश्वरसे सजाय पिन्ना।  
 ७थेतबासेलमा एनीगदे परमेश्वरसे कुल्बा ताम आड्यान्बा थेहड्बा म्हिदेन छ्याम थाभ्रउ। ८एनीगदे डाच्छा धोपधोपरी मुबा। तर दान्दे प्रभुदा डोसेबासे लमा यहाल यहालरी मुला। थेतबासेलमा दाहेन्से एनीगदे धोपधोपरी भ्रबा म्हिगदे हड् लसी आहिन तर यहाल यहालरी भ्रबा म्हिगदे हड् लसी भ्रउ। ९तिगदा भिसम यहालरी भ्रबा म्हिगदेसे लबा गे चा ज्यबादेन परमेश्वरदा सेम निबा ओच्छे सत्य तमुला। १०ओच्छे प्रभुदा सेम निबा गे तिग हिन्ना? थे गे जे लबारी म्हाइगो। ११थेतबासेलमा धोपधोपरी भ्रबा

म्हिगदेसे लबा हड्बा गे आखेलबा गे एनीगदेसे थालउ। बरु खालै म्हिसे थेहड्बा गे लजी भिसम थे म्हिदा चु लबारी आतबा गे हिन्ना भिसी पाड्गो। १२हिन्बाम, थे म्हिगदेसे लासी लबा नइबा गेला बारेरी पाड्बारीनोन पेःबा खबा ताम हिन्ना। १३तर तिगै स्हे यहालरी भजी भिसम थे स्हे खाहड्बा चीम भिसी जम्मासेन था याड्ला। तिगदा भिसम जम्मान स्हेदा म्राड्ना लबान यहाल हिन्ना। १४थेतबासेलमा चुहड् भिसी पाड्बा मुला,  
 “म्हेर्बागदे छोगो,  
 ओच्छे सिबाग्याम रेःगो!  
 ख्रीष्टसे एनीगदेदा यहाल तना लला।”

१५थेतबासेलमा एनीगदेला बानीबेहोर खाहड्बा मुला होस लसी भ्रउ। ओच्छे बुद्धि आरेबा म्हिगदे हड् लसी आहिन तर बुद्धि मुबा म्हि हड् तसी भ्रउ। १६ओच्छे एनीगदेसे याड्बा मौका स्योर्ना थालउ। तिगदा भिसम दान्देला धुइ ठीक आरे।\* १७थेतबासेलमा मूर्ख म्हि हड् तसी थाभ्रउ। तर एनीगदेसे तिग लगै भिसी प्रभुसे म्हन्बा मुला थे ताम घोउ। १८ओच्छे ड्य्होइबा स्हे थुड्सी ड्य्होइसी थाभ्रउ। तिगदा भिसम ड्य्होइबा स्हेसे म्हिदा न्होड्ना लमुला। बरु एनीगदेला सेम सदन परमेश्वरला आत्मासे प्लिड्गो। १९थेहड् लसीन

एनीगदे हाड हाड न्हडरी परमेश्वरला आत्मासे पिन्बा व्हाइ गोसी गिकसेम गिकदा विश्वासरी कोड्बा तना लउ। चुहड् लसी सेमहेन्सेन व्हाइ गोबान प्रभुदा जयजयकार लउ। <sup>२०</sup>य्हाडला प्रभु येशू ख्रीष्टला मिनरी जम्मान स्हेला लागिरी सदन परमेश्वर आबादा धन्यवाद पिन्गो।\*

### मिड हेम्बोसे लोप्तोःबा ताम

<sup>२१</sup>एनीगदेसे ख्रीष्टदा मान लबासे लमा हाड हाड न्हडरी गिकसेम गिकला तहरी चिउ।

<sup>२२</sup>प्रभुला तहरी चिबा हड् लसी मिडम्हेमेगदेएनोन हाड हाडला हेम्बोला तहरी चिउ।\* <sup>२३</sup>तिग्दा भिसम ख्रीष्ट मण्डलीला थोबो हिन्ना। थेहड् लसीन मिडम्हेमेगदेला लागिरीनोन हाड हाडला हेम्बो थोबो हड्बान हिन्ना। ओच्छे हाडला ल्हुइ मण्डलीदा थाना लबाएनोन ख्रीष्टनोन हिन्ना। <sup>२४</sup>थेतबासेलमा मण्डली ख्रीष्टला तहरी चिबा हड् लसी मिडम्हेमेगदेएनोन हाड हाडला हेम्बोला तहरी चिउ। <sup>२५</sup>ओच्छे ख्रीष्टसे मण्डलीदा माया लसी हाडला ज्याननोन पिन्बा हड् लसी हेम्फेबेगदेसेनोन हाड हाडला मिडदा माया लउ।\* <sup>२६</sup>ओच्छे ख्रीष्टसे मण्डलीदा चोखो स्होबारी बप्तिस्माला क्युइदेन हाडला

बचनग्याम खुसी धाना लबा मुला। <sup>२७</sup>ख्रीष्टसे मण्डलीदा य्हालदेन जेबा, दाग आरेबा, आज्योम्बा, तिगै चोट आरेबा, चोखोदेन तिगै दोष आरेबा मण्डली स्होसी हाडदेन छ्याम भबाला लागिरीन ख्रीष्टसे थेहड् लसी हाडला ज्याननोन पिन्बा हिन्ना। <sup>२८</sup>थेहड् लसीन हेम्फेबेगदेसेनोन हाड हाडला मिडदा हाडला ल्हुइदा हड्नोन माया लदोमुला। हाडला मिडदा माया लबागदेसे जे हाडला ल्हुइदाएनोन माया लमुला। <sup>२९</sup>तिग्दा भिसम खालै म्हिसेन हाडला ल्हुइदा आज्यना आलमुला। बरु ज्यबा तबारी ज्यना लसी चबा क्वान्बा लमुला। थेहड् लसीन ख्रीष्टसेनोन हाडला ल्हुइ मण्डलीदा ज्यना लमुला। <sup>३०</sup>तिग्दा भिसम य्हाड ख्रीष्टला ल्हुइ तबासे लमा य्हाड गिकनोन हिन्ना।

<sup>३१</sup>“थेतबासेलमा म्हिसे हाडला आबा आमादा ख्लासी हाडला मिडदेन छ्याम ठिक्सी चिमुला। ओच्छे थेन्नी ल्हुइ गिक हड्बान तसी चिमुला।”\* <sup>३२</sup>चु य्हाड म्हिला ज्ञानसे घोखम्बा ताम आहिन। चु ताम डाइ ख्रीष्टदेन मण्डलीला बारेरी पाड्बा हिन्ना। <sup>३३</sup>तर चु ताम एनीगदेसेनोन लतोःबा ताम हिन्ना। थेतबासेलमा एनीगदे जम्मासेन हाड हाडला मिडदा हाडदा हड्नोन माया लउ, ओच्छे

मिडम्हेमेसेनोन हाड हाडला हेम्बोदा  
मान लउ।

### आबा आमादेन कोलागदेसे लोप्तोःबा ताम

६ कोलागदे, एनीगदे प्रभुला म्हि  
तबासे लमा, हाडला आबा  
आमासे कुल्बा ताम ड्यान्गो। तिगदा  
भिसम आबा आमासे कुल्बा ताम  
ड्यान्बान ज्यबा हिन्ना। \* २“हाडला  
आबा आमादा मान लउ” चु चा  
परमेश्वरसे मोशादा पिन्बा ठिम न्हडरी  
परमेश्वरसे कबुल लसी जम्मान  
भन्दा डाच्छा कुल्बा ताम हिन्ना। \*  
३थे कबुल चा एनीगदेसे आबा  
आमादा मान लजी भिसम जम्बुलिडरी  
एनीगदेदा ज्यबा तसी छेहेड्बा हिन्ना।  
४आबा आमागदे, एनीगदेसेनोन  
हाडला कोलागदेदा बोमो खना  
थालउ। तर थेनीगदेदा तहरी थान्सी  
प्रभुला बचन लोप्बान छर्ना लउ। \*

### नोकरदेन मालिकगदेसे लोप्तोःबा ताम

५नोकरगदे, एनीगदेसे ख्रीष्टदा  
सेमहेन्सेन मान लबा हड् लसी  
जम्बुलिडरी मुबा हाडला  
मालिकदाएनोन मान लउ। ओच्छे  
थेनीगदेसे कुल्बा ताम ड्यान्गो।  
६एनीगदेसे मालिकगदेला डाच्छा

थेनीगदेदा ताड्ना लबारी जे गे लबा  
आहिन, तर ख्रीष्टला गे लबागदेसे हड्  
लसी एनीगदेसे सेमहेन्सेन परमेश्वरसे  
म्हन्बा अन्छार गे लउ। ७ओच्छे  
म्हिगदेदा उन्बाला लागिरी आहिन, तर  
प्रभुला लागिरी हड् लसी सेमहेन्सेन  
ज्यना लसी गे लउ। ८थेतबासेलमा  
एनीगदे नोकर हिन्सै आहिन्सै ज्यबा  
गे लबा म्हिसे प्रभुग्याम थे अन्छारलान  
इनाम याड्ला भिबा ताम एनीगदेदा  
थानोन मुला। \*

९थेहड् लसीन मालिकगदेसेनोन  
हाडला नोकरगदेदा आज्यबा व्यवहार  
थालउ। तिगदा भिसम एनीगदे न्हीलान  
मालिक स्वर्गरी मुला। थेसे निसाफ  
लबा धुडरी खालेला ली च्यासी  
आल। \*

### परमेश्वरसे पिन्बा हतियार

१०दाहेन्से एनीगदे प्रभुदेन गिक  
तसी थेला घेन शक्तिग्याम भड्सी  
चिउ। ११ओच्छे शैतानसे एनीगदेदा  
फसब लबारी म्हाड्बा जुक्तिगदेदा  
ढाबारी सेनासे हड् लसी परमेश्वरसे  
पिन्बा जम्मान हतियारगदे थोगो।  
१२तिगदा भिसम यहाड् म्हिदेन  
लडाइ लबारी आहिन, तर जम्मान  
शासन लबा शक्तिगदेदेन लडाइ  
लबारी हिन्ना। थेहड् लसीन चु  
धोपधोप्बा जम्बुलिडरी शासन लबा

६:१ कल ३:२० ६:२-३ प्रस्था २०:१२; व्यव ५:१६ ६:४ कल ३:२१

६:५-८ कल २:२२-२५ ६:६ व्यव १०:१७; कल ३:२५; ४:१

शक्तिगदेदेन मुरी मुबा जम्मान म्हडला आत्मागदेला शक्तिदेन लडाइ लबारी हिन्ना। १३थेतबासेलमा परमेश्वरसे पिन्बा जम्मान हतियारगदे एनीगदेसे सदन थोजी भिसम शैतानना सेना छेबारी खबा धिनरीनोन एनीगदे थेदेन छ्याम छेबारी खम्ला। ओच्छे लडाइ ढासीनोन एनीगदे भङ्सी चिखम्ला।

१४थेतबासेलमा सेनागदेसे क्रेप्सरी पेटी खीबा हङ् लसी एनीगदेसे हाडदा सत्यसे खीगो। ओच्छे थेनीगदेसे कुरी पाता थान्बा हङ् लसी एनीगदेसेनोन परमेश्वरदा सेम निबा बानीबेहोर थोसी तयार तसी चिउ। \*

१५ओच्छे लखम क्वान्बा हङ् लसी शान्ति पिन्बा थार्बा पिन्बा समाचार थोसी तयार तउ। \* १६ओच्छे अर्गु ताम चा एनीगदे सदन विश्वासला ढाल थोसी चिउ। थेहङ् लसी चिजी भिसम शैतानसे पुइखबा मेला बान एनीगदेसे साइखम्ला। १७थेहङ् लसीन परमेश्वरसे एनीगदेदा पिन्बा थार्बादा सेनागदेसे टोप कूबा हङ् लसी सदन कूसी चिउ। ओच्छे परमेश्वरला आत्माला तरवार थोगो। थे तरवार चा परमेश्वरला बचन हिन्ना। \*

१८थेतबासेलमा परमेश्वरला आत्माग्याम एनीगदेसे सदन जम्मान स्हेला लागिरी प्रार्थना लउ। चुहङ्



ढाल (६:२०)

लसीन जम्मान परमेश्वरला म्हिगदेला लागिरीनोन सदन भन्सी प्रार्थना लउ।

१९ओच्छे डाइ ताम पाङ्बारी छ्याइमा तिग ताम पाङ्तो:बा थे ताम परमेश्वरसेन लोण्गै। ओच्छे म्हिसे था आयाङ्बा थार्बा पिन्बा समाचार आलोङ्गान स्पहान्दो म्हिगदेदा घोना लबारी खम्लै भिसी डाला लागिरी प्रार्थना लसी पिन्गो। २०चुनोन थार्बा पिन्बा समाचारला लागिरी भ्याल्खानरी परब तबा डा ख्रीष्टला दूत हिन्ना। ओच्छे डाइ आलोङ्गान चुला बारेरी पाङ्बारी खम्लै भिसी प्रार्थना लसी पिन्गो।

### चिठीला थुमरी भिबा ताम

२१ प्रभुला गेरी विश्वास लखम्बा  
 डन्से माया लबा आले तुखिकसदा  
 डाइ एनीगदे मुबा ग्लारी पुइखबा मुला।  
 ओच्छे डादा खाहड्बा मुला भिबादेन  
 डाइ तिग लबान मुला भिबा जम्मान  
 ताम थेसेन एनीगदेदा पाड्ला।\*  
 २२ ओच्छे चुरी डन्दा खाहड्बा मुला  
 भिबा ताम था याड्सी एनीगदेसे आँट

याड्गै भिसी डाइ एनीगदे मुबा ग्लारी  
 थेदा पुइखबा हिन्ना।\* २३ ख्रीष्टदा  
 विश्वास लबा ज्योज्यो आले नाना  
 आडा जम्मादान यहाडला परमेश्वर  
 आबादेन प्रभु येशू ख्रीष्टग्याम  
 विश्वासरी कोड्सी मायादेन शान्ति  
 याड्गै। २४ थेहड् लसीन यहाडला  
 प्रभु येशू ख्रीष्टदा जुकजुकधोना  
 माया लबागदेदेन छ्याम परमेश्वरला  
 दयामाया तगै।